

KERATAN AKHBAR

(Bahagian Canselori)

Surat khabar: Utusan Sarawak (Tempatan)

Hari/Tarikh: 16/3/2016

Muka surat: 4

Tajuk : Anjak sastera Melayu ke persada tertinggi



**WACANA ...** Profesor Madya Dr Jeniri Amir (kiri) membicara topik Bahasa Penyatuan Rakyat Sarawak Melalui Bahasa dan Sastera Kebangsaan dalam sesi forum Himpunan Memperkasakan Penulis Sarawak di BCCK, Kuching semalam. Turut kelihatan (dari kanan) Haji Hamzah Hamdani, penggerusi forum Abang Haliman Abang Julai dan Dr Hazami Jahari.

## Anjak sastera Melayu ke persada tertinggi

KUCHING: Penulis di Sarawak harus memanfaatkan bahan tempatan dalam hasil karya sastera mereka, saran seorang pensyarah dari Universiti Malaysia Sarawak (UNIMAS) Profesor Madya Dr Jeniri Amir.

"Sarawak adalah 'lombong emas' dari aspek sumber ilham bagi para penulis," katanya dalam sesi forum dalam Himpunan Memperkasakan Penulis Sarawak yang diadakan di Borneo Convention Centre Kuching (BCCK) pagi semalam.

Sehubungan itu para penulis perlu tekun dan berlitizam dalam usaha mereka dengan banyak membaca dan menulis, tambahnya dalam pertemuan yang dianjurkan oleh Yayasan Pembangunan Buku Negara (YPBN) dengan kerjasama Gabungan Persatuan Penulis Nasional Malaysia (GAPENA), Dewan Bahasa dan Pustaka (DBP), Persatuan Karyawan

Sastera Sarawak (PEKASA) dan Persatuan Penulis Utara Sarawak (PUTERA).

Ketekunan dan iltizam yang dituntut untuk menjadi penulis yang berjaya menghasilkan buku ialah dengan berpandukan "tiada hari tanpa membaca, tiada minggu tanpa menulis dan tiada bulan tanpa menghasilkan buku," sarannya. Hanya dengan ketekunan sedemikian barulah hasrat untuk memperkasakan penulis Sarawak dapat berjaya, tambahnya.

Beliau juga menyarankan agar penulis memikul tanggungjawab menggunakan keberanian intelektual mereka menyerlahkan keberanian dalam hasil karya mereka.

Dua anggota panel lain dalam forum yang bertemakan "Penyatuan Penulis Sarawak Dalam Memperkasakan Sastera Kebangsaan" ialah Pengarah Dewan Bahasa dan Pustaka Cawangan Sarawak Dr Hazami Jahari dan Setiausaha

GAPENA Haji Hamzah Hamdani. Sesi-sesi lain pada hari pertama Himpunan Memperkasakan Penulis Sarawak berkisar sekitar tajuk "Gagasan dan Harapan Penulis Sarawak" yang dibicarakan oleh Ketua Satu PEKASA Jaafar Hamdan dan seorang pensyarah UNIMAS Dillah Tuah; Bicara Bersama Penerima Anugerah Sastera Sarawak 2014 yang menampilkan Rosani Hiplee (puisi), Roslan Jameel (cerpen), Dahiri Saini (Drama) dan Radzemah Bolhassan (novel); Peranan Penulis Pelbagai Kaum Di Sarawak yang dibincang oleh Ketua Dua PUTERA Poul Nanggang, Setiausaha PUTERA Jaya Ramba dan Perunding Editorial Utusan Sarawak/Mingguan Sarawak William Chan.

Sasterawan Negara Dato' Dr Zurinah Hassan dan Bibi Sabariah dari PEKASA membincang topik "Memperkasakan Penulis Wanita Sarawak".